


Ils 14 da november: Sogn Didactus ni Diego, confessur



Sogn Diego fuva frater digl uorden da sogn Francestg Serafic, naschius da paupers geniturs ad Alcalà en la cuntrada d'Andalusia en Spagna entuorn ils onns 1400. Gia da pign ensi sespruava el dad esser devozius e da viver sontgamein. In temps ei il giuven setenius si tier in spiritual che viveva sco eremit sin in crest sper ina veglia baselgia. Retratgs dil mund e vestgius cul habit d'eremit ei Diego entiramein semess en la veta spirituala cun urar, cantar, gignar, semortificar e meditar las caussas celestias. Quels dus eremits cultivavan in iert per susteniment da lur pauper viver. Dasperas fagevan els era vischala, tschaduns ed autras caussas orda lenn per dar als paupers ni per regalar a quels che devan almosnas.

Diego veva tal desideri da daventar pader digl uorden da sogn Francestg cun sbittar tut quei dil mund cun tutta pompa e rihezia. Turnond inaga en siu eremitadi ha el anflau sin via ina buorsa plein daners e buca tucchau en quella; mobein clamau in auter um per dustar naven quei latsch dil demuni. Per contonscher la finamira da daventar pader, eis el serendius tier la claustra d'Arizafa dils paders minorits da sogn Francestg e suplicau per il vestgiu da frater. Lura ha el fatg il noviziat e silsuenter mess giu il profess tenor la regla da sogn Francestg. Maravigliusa fuva sia humilitonza, obedientscha, paupradad e carezia ed el sesenteva buca consolaus senza haver mortificau siu tgierp cun giginas e gheislas. Per stinschentar ils regls carnals sefrevà el igl unviern en auas freidas e la stad en las spinas.

Igl onn 1441 ei sogn Diego vegnius tarmess cun aunc in auter pader sin las inslas da Canaria per purtar leu il sogn evangeli. Sin ina da quellas inslas eis el schizun daventaus guardian dalla claustra da Fuerteguerra. En quella posiziun augmentava il sogn claustral sias penetienzas e ses exercעים spirituals per sepreparar da saver retscheiver la caschun d'esser marterisau e sponder siu saung per la cardientscha da Cristus. Tras sia sontga veta e ses saluteivels mussaments ha sogn Diego sco missiunari tratg biars pagauns tier Cristus. Era sch'el fuva buc in bein studegiau, saveva el declarar las caussas spiritualas ch'ils pli sabis teologs sesmarvigliavan e savevan buca rispunder a sias damondas. Bugen fuss el ius sin la gronda insla dallas Canaras per haver pli gronda speranza da vegnir marterisau, mo Diu ha disponiu auter. Ils navaturs han buca menau la nav sco il sogn leva, mobein sin in'otra riva.

Da leu ei sogn Diego turnaus en siu convent e lu vi en Spagna tier la claustra da Nossadunna da Loreto damaneivel da Seviglia. Igl onn 1450 che fuva declaraus per onn sogn, vegn Diego tarmess a Ruma accumpignaus da pader Alfonso de Castro. En la claustra da Aracelli fuvan da quei temps 3800 paders da sogn Francestg serimnai ord tut las parts dil mund per gudignar il perdun digl onn sogn ed assister alla solemna canonisaziun da sogn Bernardin da Siena. Treis meins ein quels buns paders restai a Ruma e denton ei la gronda part dad els vegni malsaus e la claustra pareva d'esser in ver spital. Ussa ha sogn Diego cun tutta premura, quita e carezia entschiet a tgiar ils malsaus senza schar muncar ni vivonda ni medicaments. Quei vegn teniu per ina miracla da survegnir tut quei che fageva da basegns, pertgei da quei temps regeva pervia digl onn sogn gronda munconza da vivonda e da medicaments.

Da Ruma ei il survient da Diu lu turnaus en Spagna e tarlischau leu vinavon cun vertids da gronda sontgadat che vegnevan confirmadas cun claras miraclas. Sia pli impurtonta occupaziun fuva da patertgar e meditar la passiun da Cristus e leutier teneva el adina in cruzifix enta maun. Speciala devoziun veva sogn Diego tier il sontgissim Sacrament digl altar e tier Nossadunna. Sias sontgas Communiuns retscheveva el cun tala reverenza e preparaziun che siu cor pareva d'esser in spir fiug da carezia tier Diu. Las sondas e las vigelgias da Nossadunna giginava el cun paun ed aua ed en tuts basegns recureva el tier la mumma da Jesus. Biars malsauns medegava il sogn cugl ieli dall'ampia ardenta avon la statua da Nossadunna.

A Seviglia ha el entupau sin via ina dunna che bargeva e burleva, sco sch'ella fuss orda senn. La raschun fuva la suandonta: ella veva sevilau sin siu buob da siat onns ch'ei lu per tema dad autras smanatschas sezuppaus en fuorn e sedurmentaus en. La mumma senza mirar pli bia envida quel per far paun. Strusch ch'il fiug ha ars ha ella udiu siu affon a grend entadem il fuorn. Cheu seglia ella ora sin via per clamar en agid zatgi. Per ventira stat sogn Diego cheu. El recamonda alla mumma d'immediat serender en baselgia e rugar tier Nossadunna pil salit da siun affon. La mumma obedescha e cura ch'il fiug fuva stez, ei siu affon sortius dil fuorn senza ver pitiu donn. Cun tala miracla ha Diu vuliu palesar la pussonza da sia gloriosa mumma ed era per mussar la gronda devoziun ch'il sogn fra teneva tier Nossadunna.

Schi ardenta fuva la carezia cun la quala sogn Diego carezava siu proxim per amur da Diu. El visitava buca mo ils malsauns, mobein surveva ad els cun bitschar e schubergiar lur plagas. In di caminava il sogn cun siu cumpogn viers la claustra da sogn Lucas da Barrameda. Il viadi fuva liungs e stentus ed il cumpogn cheutras vegnius staunchels e fleivels, damai ch'els vevan la vivonda che muncava. Diego dat curascha a siu fideivel cumpogn e di da ver fidonza enten Diu che vegni a proveder per lur basegns. Els ruaussan empau, fan oraziun, aulzan lur eglia e vesan buca lunsch naven sil fons ina tuaglia rasada ora cun ina detga minestra sisu e paun e vin dasperas. Els laudan Diu per quels duns, engrazian e maglian consolai e confortai da tgierp ed olma.

Ord quels fatgs sa scadin s'immaginar tgei grond survient da Diu sogn Diego ei staus. Suenter haver contonschiu ina biala vegliadetgna ha Diu vuliu clamar el tier la perpetna beadientscha. El vegn malsauns e survegn ina apostema en in bratsch che caschuna grondas dolurs. El retscheiva ils sogns Sacraments dils moribunds, roga ses confrars per perdun e supplichescha culs eglis plein larmas da dar ad el ina rassa ed ina corda per saver suandar siu patriarc sogn Francestg e murir en humilitionza e pupira. Lura pren el ina crusch da lenn enta maun, betscha quella e salida ella culs plaids latins: „dulce lignum, dulces clavos, dulcia ferens pondera“ e cun quels dultschs plaids eis el sedurmentaus en Cristus ils 14 da november digl onn 1463. Siu tgierp ei staus ditg en bara per ch'il grond pievel sappi prender cumiau dil sogn pader. Muort las miraclas daventadas tras ils merets da sogn Diego, eis el igl onn 1588 vegnius canonisau da papa Sixtus V.

Reflexiun

Sogn Diego, in pauper frater senza studis e sabientscha mundana, ussa en la gloria dil tschiel, vegn sil mund honoraus da retgs e prenzis e tgei vul quei dir? Diu vul dar d'enconuscher ch'ils humiliteivels seigien ad el plascheivels ch'els hagian d'esser alzai e cun favurs specialas da Diu honorai. Ils loschs e garmadis encuntercomi che seglorieschan da lur gronda pussonza

e sabientscha, hagian da restar sbassai e confundi. La vera perdertadad dils survients da Diu consista enten la humilitonza, pazienza, mortificaziun ed obedientscha viers ils condaments da Diu e la schubradad dil cor. Quellas vertids praticadas fan gronds ils pigns, rehs ils paupers, perderts ils ignorands e confundan tutta carezia mundana che smacca cun greva peisa las olmas ella perdiziun. Villeg. Ribad.